

Mazarin  
3030

Recit veritable des discourse...

UNIVERSITY OF N.C. AT CHAPEL HILL



00023009209

**RARE BOOK  
COLLECTION**



**THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL  
Mazarin  
3030**





R E C I T  
V E R I T A B L E  
D E S D I S C O U R S

tenus entre les trois Figures qui  
sont sur le Pont au Change, sur les  
affaires de ce temps.

**A**YANT souppé chez vn de mes amis le iour du Mardy Gras, ie partis sur les vnze heures du soir pour retourner en mon logis, sans peur aucune des filoux, dont l'absence de la Cour nous garantit. Je rencontré fort peu de monde par les ruës; Le Blocus de cette ville & la Conjoncture des affaires presentes, ayant interdit les rejoyssances que l'on a coustume de prendre en ces iours, nommément sur le Pont au Change où ie passé, ie ne vis qui que ce fust. Ce qui me fit arrester tout court le lacquais qui portoit vn flambeau deuant moy, ayant entendu cracher plusieurs fois comme vne personne qui s'appreste à discourir: Ayant regardé de tous costez sans voir personne, ie leuë les yeux en hault, & reconneus que c'estoit la Figure du feu Roy, qui par vn prodige tout nouveau auoit l'vsage de la parole. Cela m'eust estonné d'auantage en vn autre temps que celuy-cy où nous ne voyons que merueilles, & choses tout à fait esloignées de l'ordinaire, ma curiosité me fit arrester tout court, & i'entendis mot pour mot les discours suiuians, que i'ay trouuez trop considerables pour n'estre pas reuelez au public, ayant pour testes singes irreprochables deux lacquais qui me suiuoient, & toutes les Enseignes qui sont dessus le Pont. La Figure du feu Roy dans la mesme posture qu'elle est, ayant seulement incliné la teste, parla ainsi qu'il suit, à la Reyne.

**MADAME**, l'esperance que i'ay toujours eue, que vous feriez cesser les desordres de l'Estat, m'a fait long-temps demeurer dans le silence, mais voyant les choses dans l'extremité, tout le Royaume du Roy vostre fils & du mien, dans vne guerre espouuentable & en proye aux ennemis: Je n'ay pû rester d'auantage, sans vous dire que vous estes obligée en conscience, de faire cesser tous ces troubles, puisque vous le pouuez, en quittant les mau-



uais conſeils de ceux qui vous ont conduit imperceptiblement dans les precipices & dangers dans leſquels tout l'Eſtat va tomber, ſi l'on ne luy donne ſecours pour le releuer au pluſtoſt. Lors que ieus reconnu les deſauts du feu Cardinal de Richelieu trop tard pour mes ſujets, puis que c'eſtoit apres ſa mort & apres les auoir fait long-temps ſouffrir, ie taſché d'y remedier, mais Dieu me voulant retirer hors du monde pour me faire rendre compte de mon gouuernement, l'eſperé que la Pieté que vous m'auiez toujours fait paroître pendant le miniſtere du Cardinal de Richelieu, & que toute la France admiroit, ne ſeroit point diminuée par l'autorité que ie vous laiſſois entre les mains; Et ie penſé que vous ſeriez tout voſtre poſſible pour retirer le pauvre Peuple dont ie vous laiſſois la Regence, des miſeres & des neceſſitez où mon Indulgence les auoit laiſſé tomber, cognoiſſant les deſordres que cauſent l'ambition, & l'auarice d'un Miniſtre qui gouuerne ſeul ſoubs le nom de l'autorité Royale. Je vous laiſſé cinq Conſeillers, par l'aduiſ deſquels ie vous prié de conduire cette grande Monarchie afin que les vns & les autres fuſſent temperez enſemblement pour le bien de cet Eſtat. Mais vn ſeul, tres-pernicieux, preuallut ſur beaucoup d'autres. Et le Gouuernement demeura entre les mains du Cardinal Mazarin, homme que ie n'auois jamais reconnu ſi meſchant, que toutes ſes actions faites depuis, me l'ont fait cognoiſtre. Et comme ſi vous euſſiez eſté preuenü ou obſedé par quelque charme, vous luy laiſſaſtes le Gouuernement à l'excluſion des autres que ie vous auois nommé par ma derniere volonté. L'emprisonnement de mon Couſin de Beaufort, l'exil des Eueſques de Beauuais & de Liſieux, ne pouuoient-ils pas vous donner des marques aſſurées, que cet ambitieux vouloit ſe rendre maiſtre abſolu de vos volontez, auſſi bien que de l'Eſtat? Toutes les autres actions qu'il a faites depuis en aſſez bon nombre, pour meriter vn ſupplice & vn chaſtiment exemplaire. La neceſſité miſe par toutes les Prouinces, l'indigence dans les coffres du Roy, l'arentat meſme commis en ſa perſonne depuis vn mois & demy, ne peuuent elles rompre ce bandeau qui vous empêche de voir ouuertement ſa malice? Je ne puis croire qu'on ne vous cache ce qui ſe paſſe, & que toute la France a les armes à la main, que tous vos ſujets ſe vont couper la gorge les vns les autres, ſi vous ne les deſarmez en leur donnant la paix, qu'ils deſirent depuis ſi long-temps, & dont ils ont tant de beſoin. Iamais vn Conſeil ſemblable à celui qu'il vous a donné, de vouloir affamer vne ville floriffante & peuplée comme Paris, dont les neceſſitez du Roy ſont plus ſoulagées que de tout le reſte du Royaume, n'auroit peu m'eſblouir à ce point, que pour ſatisfaire à ma colere contre quelque particulier, ie m'en paſſe & vouluſſe ſeruir, c'eſt auoir entierement quitté les volontez que les Souuerains ſont obligez d'auoir pour la conſeruacion de leurs peuples, que de les opprimer, de permettre les voleries, les brigandages, les incendies, les uſſacres, les violemens meſme des Religieuſes, c'eſt auoir mis bas les ſentimens du Chriſtianisme. Je ne ſuis pas icy fort ſur ma derniere volonté, dont vous auez fait ſi peu de conte: Je ne m'arrete point à beaucoup de particularitez pour leſquelles vous ſerez tres-rudemement reſ-



prise deuant le Tribunal de la diuine Iustice où vous trouuerez que l'on ne se justifie point, & où la qualité ne fait rien que pour rendre les fautes plus pesantes, mais ie parle de ce qui se commet auourd'huy, dont il n'y a qui que ce soit, qui vous puisse defendre de la peine de ces crimes, puisque celuy qui permet le crime, n'est pas plus innocent que celuy qui le commet. Je parle dy-je de tous ceux que vostre colere se sacrifie, dont le sang repandu crie vengeance deuant Dieu. Je parle des embrasemens & de toutes les pilleries qui se font sous vostre autorité avec grande offence. Et il n'y a qui que ce soit, qui puisse dire que vous soyez exempte de restituer tout ce qui se vole à vos Sujets, à peine de damnation eternelle. Songez à ce que vous faites, voyez clairement & sans passion ce qui se fait : Informez-vous vous-mesme des volontez des vns & des autres, sans souffrir la flatterie de ceux qui vous obsèdent, qui sont pires mille fois que des demons. Que l'innocence du Roy, vostre Fils & le nostre, ne soit point punie pour vostre faute, & rentrant enfin dedans vous-mesme, rendez au Roy ce qui luy appartient, qui sont toutes les acclamations & tous les seruices que son peuple luy desire; Rendez, rendez à vos Sujets ce que vous leur deuez, qui est la paix, la justice & la conseruation de leurs biens; Rendez-vous à vous-mesme ce que vous vous deuez, en acquittant vostre conscience, & la mettant à couuert de tant de crimes, desquels vous rendrez compte tres-exact & tres-rigoureux deuant Dieu.

Ces dernières paroles furent prononcées d'une voix un peu plus aigre & plus rude que le commencement: Et cette Figure ayant quitté la parole, celle de la Reyne ne tarda gueres à luy respondre, à peu près: comme ie vais le reciter.

**S**IRE, l'aduouë que c'est une grande extrémité où est réduit tout l'Estat, puisque pour faire regner la Iustice; Et maintenir l'autorité Royale ie suis obligée de permettre, & de faire agir les supplices pour punir des Rebelles, & des Refractaires aux commandemens du Roy, pour leur monstrier qu'ils ont tort de mesconnoistre leur Souuerain, & cette autorité absolue de leurs Monarques: Mais lors que les Sceptres sont dans les mains des Roys, ils ont aussi bien l'Espée pour punir les Couppables, comme les bien-faits, & les graces pour recompenser les Vertueux; & puis qu'ainsi est, que vous auez semblé me blâmer de ce que j'ay fait, ie veux vous en rendre conte, & vous faire voir qu'il n'est pas difficile de m'excuser. Apres que j'eux rendu, & fait rendre les derniers deuoirs à vostre memoire, ie mis tout mon pouuoir à faire estendre les bornes de ce Royaume, & Dieu secondant mes vœux, me donna en peu de temps des aduantages tres-considerables, lesquels estant obligé apres Dieu, de referer à la prudence du Cardinal Mazarin, & à la valeur du Prince de Condé d'auourd'huy, i'eus raison ce me semble, de preferer ce Ministre, à tous les autres, que vous n'auez laissez, n'en voyant pas un qui prist tant de peine à me complaire que luy, & à suivre mes volontez: Vostre exemple m'estoit toujours deuant les yeux, & ayant veu que vous auiés laissé le Gouvernement entier, pendant vostre viuant, au Cardinal de Richelieu, ie n'estimay pas mal faite de



laisser aussi vn semblable Cardinal, qui regit le timon de l'Estat, puis que vous-mesmes vous ne m'auez pas trouué capable de le faire toute seule. Il pensoit à ma conseruation, & moy ie traualle à la sienne, voyant assez que i'auois besoin de luy. Le Duc de Beaufort entra en jalousie de voir que i'estimois ce Cardinal, & ayant conspiré sa ruïne, ie fus obligée de le faire arrester, pour garantir celuy que j'aimois : & de faire retirer ceux qui estoient de son intrigue. Qui peut dire qu'il y ait jamais eu Ministre d'Estat qui ait trouué plus de moyens de leuer del' argent dans la France, que luy ? A-t'il laissé quelque inuention dont il ne se soit pas seruy pour trouuer dequoy maintenir l'autorité du Roy ? Où voit-on que les reuenus du Roy de France, d'vne seule année se soient montez à cent & trente millions, comme il a fait monter ? apres quoy, ie croy n'auoir pas beaucoup dequoy me iustifier de ce que quelques petits ie ne sçay qui du Parlement, s'estant opposez directement à l'autorité absoluë du Roy, ont tasché par toutes sortes de moyens, de trauerfer les bons desseins du Cardinal Mazarin, qui sans leur entreprise auroit encor leué cette année plus de dix millions par des moyens, tous nouueaux. Je fus obligée pour maintenir cette autorité independante, du Roy, d'en faire arrester quelques vns : Et le Peuple ayant esté assez insolent pour prendre les armes à cause de deux que l'on auoit fait arrester, le leur rendis, voyant bien que ie n'estois pas la plus forte, avec resolution de n'en pas demeurer là : quelque temps apres i'enmené le Roy hors Paris, pour leur faire peur, ie fis approcher les troupes. Enfin à la sollicitation de son Altesse Royale ie leur laissé faire vne Declaration telle qu'ils voulurent, ayant bien dessein de n'en rien faire executer : mais si tost que la paix seroit faite en Allemagne, de faire venir toutes ces Belles gens-là à la raison. C'est ce que i'ay fait du conseil & de l'aduis de mon frere le Duc d'Orleans, & de mon Cousin le Prince de Condé, lequel a entrepris luy-mesme par les traux continuels qu'il prend, de les faire venir la corde au col demander pardon : ce que ie ne tarderay plus guere à faire executer.

A peine auoit elle acheué ces dernieres parolles, que la figure du feu Roy reprit en ces termes :

Enfin, Madame, vous estes extremement zelée pour l'autorité Royale, mais plustost pour la tyrannie, que vous honorez de ce beau nom. Sçaez vous que c'est deffigurer l'Image de la diuinité, que de ternir ainsi ceste belle autorité du Roy, qui est sa viue image ? L'on voit icy que les Estats Monarchiques sont plus recommandables que les autres, parce qu'ils approchent le plus de la diuinité, qui estant le principe de toute chose, il en est aussi la fin ; Les Roys aussi à l'imitation, & exemple de leur Createur, doiuent estre le principe de toutes les bonnes actions, qui se doiuent, & peuvent faire, en doiuent aussi estre la fin, puis que le tout retombe à leur gloire & à leur honneur, qui sera d'autant plus multiplié qu'ils auront pris de peine à faire leur deuoir, & à satisfaire à ce, à quoy ils sont obligez par la toute puissante main de Dieu. L'Autorité des Roys n'est pas venerable, en tant qu'elle consiste dans vne independance telle que les Flateurs qui vous environnent, vous la font conceuoir : elle tire tout son

son

20. 210

48722

828278

00.



son lustre, & son plus bel ornement de dependre, mais de la raison, de l'équité & de la justice, & dès lors qu'elle le dispense, elle entre dans la tyrannie qui est autant detestable, que l'autre est à venerer. Vous dites que vostre Cardinal Mazarin, est extremement amateur de cette autorité que vous voulez garder inuiolable, & par ce que j'ay dict vous pouuez voir qu'il affecte la tyrannie: vous treuues bon qu'il aye treuvé des inuentions inouyes, pour leuer des nombres immenses de millions, & ne confiderez pas qu'il a ruyné vostre Estat, puis qu'il a ruiné tout vostre peuple. Que fera le Roy, lors qu'estant Majeur il voudra entreprendre quelque chose? Les domaines sont engagez, toutes les forests vendues, les villages abandonnez, les terres desertes, les villes n'ont que peu d'habitans qui portent tous la viue image de la mort. Sera-ce pour lors le Cardinal Mazarin qui suscitera de nouueaux moyens de l'aider, comme le pourroit faire ce Peuple qu'il a pillé avec tant d'effronterie? Les biens des peuples ne sont pas en la possession des Roys, comme on vous le fait croire, les Roys leur sont donnez de Dieu pour maintenir tous leurs Sujets en paix, & en la possession legitime de leurs biens. Ce qui se voit plus clair que le iour, par cette maxime, que les Roys ne sont que pour les peuples, mais il ne se peut pas dire que les peuples soient pour les Roys. Et ce dont vous estes le plus à blasmer, c'est de mespriser vn de vos Parlemens, le plus celebre & le plus auguste Corps des Officiers de France, duquel vous auez osé en faire emprisonner quelques vns des plus gens de bien que vous appelez de Belles gens. Vous voulez dire que vous maintenez l'autorité Royale, & vous la rauallez au plus bas, en la mesprisant dans ceux qui la rehaussent, & que vous opprimez. Vous les appelez Rebelles, en ce qu'ils sont fideles à leur Roy; & desobeïssans, parce qu'ils veulent maintenir son bien & son plus bel apennage, qui est la justice; Vous armez contre eux, & les forces que vous deuriez tourner contre l'Ennemy commun de l'Estat, vous les tournez contre vous-mesme en les tournant contre le seruice du Roy, en donnant toutes nos Conquestes & toutes les Frontieres en proye aux Ennemis, comme si l'on estoit avec eux d'intelligence. Dauantage, quand bien cela ne seroit pas, que quelques-vns du Parlement auroient choqué l'autorité Royale. Pourquoi faut-il que deux cens mille innocens, voire toute la France souffre pour des particuliers? Et vous dites que vous auez les consentemens de mon frere le Duc d'Orleans, ou plustost celuy de son valet, celuy de mon Cousin le Prince de Condé, mais songez, c'est vn jeune homme que le feu de son courage emporte sans le laisser considerer assez attentiuement l'importance de ce qu'il entreprend. Ainsi vous voyez que tout ce que vous pouuez dire, est inutile. Pour moy, ie vous demanderay conte deuant le Tribunal de la Justice de Dieu, de tous les Sujets dont ie vous ay laissé la Regence. Et peut-estre que le Roy vostre Fils, & le mien, lors qu'il sera en majorité, vous fera rendre compte de ce que vous faite aujourd'huy à nos despens & à nostre confusion. Ne flattez donc pas ce dessein que vous auez, de vous vanger, de l'esperance que vous auez que le Prince de Condé requira bien-tost tous les habitans de cette grande ville.



à venir la corde au col demander pardon, puis qu'ils n'ont point offensé, & foyez tres-assurée que si le respect ne les retenoit, & qu'ils ne vous considéraient comme la Mere de leur Roy, ayant beaucoup plus de forces que vous, ils pourroient vous faire repentir tout à loisir de ce que vous auez entrepris avec trop de temerité, de promptitude, & d'inconsideration. Et craignez enfin que Dieu ne se serue de tous ces troubles pour vous punir desicy bas, des crimes & des offenses qui se sont commises contre luy sous vostre autorité. La Reyne parut fort surprise de voir que tout ce qu'elle auoit dit, auoit esté refusé si iustement, mais elle le fust encore dauantage lors que la Figure du Roy luy dit,

MADAME, tout ce que vous auez mis en auant, ayant esté mis au neant par des raisons si viues & si pressantes, vous ne deuez point tarder à vous reconnoistre, ny à faire cesser tous les troubles qui causent vne consternation si generale par toute la France. Je croyois vous auoir obligation, des soins que vous vouliez prendre, de conseruer mon autorité, que vous me persuadiez facilement estre lezée par les assemblées du Parlement & des autres Cours souueraines pour s'opposer aux mauuaises volonteiz du Cardinal Mazarin. Mais au contraire, ie voy que vous m'auiez voulu tres-sensiblement desobliger en m'esleuant dans la pensée, que les Roys doiuent estre tyrans, & non pas raisonnables, & me faisant conceuoir vne haine contre tous mes Sujets, que ie n'ay iamais pû croire auoir de mauuaises volonteiz pour moy. Combien de fois vous ay-je dit depuis que nous sommes hors Paris, que i'y voulois retourner, & que i'estois bien assuré, quoy que vous me disiez, que l'on vouloit attenter à ma personne, que par tout l'on crieroit viue le Roy. Vous auez refusé d'entendre les Gens du Roy de mon Parlement de Paris, lors qu'ils sont venus vous faire leurs tres-humbles Remonstrances: Et vous n'auiez pas voulu seulement permettre que ie les visse. Lors que l'Archeuesque de Thoulouze est venu icy vous dire, qu'en conscience vous estiez obligée à entendre à vn accommodement: vous luy auez respondu que vous estiez toute preste d'y entendre, mais que vous vouliez maintenir l'autorité Royale; Mais il se trouue que cette autorité que vous voulez m'attribuer, n'est autre qu'une tyrannie tres-injuste; & qu'au lieu du nom de Roy, vous voulez me qualifier du nom de Tyran.

I'ay sujet de suiure les mouuemens que i'ay receus du discours du Roy, mon tres honoré Seigneur & Pere, & vous assenrer que lors que ie seray hors de la minorité, i'espere que le bon Dieu me donnera du monde apres de moy, qui me fera voir clairement la verité, ie vous feray rendre compte en plein Parlement, de vostre Regence, & de l'administration de mon Royaume, & sera tres iuste que ceux qui vous ont receu pour Regente, examinent de quelle façon vous vous estes comportée dans le Gouvernement de l'Estat. I'ay toujours remarqué toutes les fois que i'ay tenu seance en mon Parlement, que chacun me portoit fort grand respect, & que si quelques vns resinoignoient du mescontentement, ce n'estoit pas de me voir, mais à cause du sujet pour lequel i'y allois, qui a tousiours esté pour augmenter les subsides, & les imposts, & surcharger mes Sujets,



de quelque nouvelle meschanceté ; vous faictes que ce Cardinal que vous supportez , vienne icy me caresser , m'apprendre de petits jeux , me donner des Bijoux & autres badineries ; & pensez-vous que ie sois toujours Enfant ? & quoy que vous fassiez tout vostre possible , pour m'oster le dessein que i'ay , de cognoistre le plustost que ie pourray , ce qui se passe dans mon Royaume , ie vous assure que ie voy que toutes les actions ne sont que fourberies , ce que ie remarque mesme dans le ieu ; & selon ce que i'entends de tout le monde , qu'il ne fait aussi que vous tromper. Puisque tous les desordres qui sont dans cét Estat , ne sont pas encor hors d'accommodement , entendez-y le plustost qu'il se pourra. Ie vous en prie. Madame , par les plus tendres sentimens d'affection que vous m'avez jamais tesmoigné. Ie vous en coniure par tous les actes de pieté , que vous reïterez si souvent : Faites ; Madame , que ie retourne au plustost à Paris , d'où ie ne puis estre long-temps absent , sans m'ennuyer tresfort , tous les diuertissemens que vous me pouuez faire prendre icy , estant trop foibles , pour m'oster la pensée que i'ay , que l'on me desire à Paris avec impatience.

Ie vis bien que la Reyne auoit esté extremement estonnée d'entendre ces deux derniers discours ; Car sur la fin du preedant ayant mis la main sur son estomac pour se iustifier , lors qu'elle vit que le Roy commençoit aussi à parler , elle demeura comme toute interdite , & resta dans cette posture , ayant attendu quelque temps , & veu que tout estoit extremement paisible , & dans vne grande tranquillité comme auparauant , i'advance pour gagner mon logis , & i'entendis d'une voix confuse , les vrais moÿens d'accommodement sont , de faire reuenir icy le Roy au plustost , de conuoyer les Estats Generaux du Royaume , avec toute la liberté des suffrages , & des deputations : Et faire cependant executer de point en point , la Declaration du mois d'Octobre dernier. Ie fis tout mon possible pour sçauoir d'où venoit cette voix , mais ie n'en peus rien apprendre : ie m'en reuins aussi tost chez moy , où ie mis la main à la plume , afin que tout ce que i'auois entendu , ne m'eschappat de la memoire : i'en fis lecture deuant mes Lacquais , qui m'assurerent le tout contenir verité. Et auioard'huy ie les ay donnez pour les faire voir au public. Voyez , Amy Lecteur , quelle esperance nous deuons auoir de l'issuë de ces affaires , puisque les choses inanimées s'interessent pour nostre salut & prosperité. Et que la Bronze a l'usage de la parolle , pour apprendre à nos ennemis , ce qu'ils sont obligez de faire. Que sera-ce encore quand Monsieur le Duc de Longueuille avec vingt trois , ou vingt quatre mille mains , plus que Briarée viendra secourir nos demy Dieux. Que cette esperance seule nous console , de ce que le pain est vn peu chair , & cependant n'espargnons ny nos Bourfes , ny nos personnes pour concourir avec ceux qui trauaillent à l'establissement de nostre liberté.

A PARIS,

Chez PIERRE TARGA , rue Saint Victor au Soleil d'Or.

M. DC. XLIX.



21819

THE LIBRARY OF THE UNIVERSITY OF CHICAGO

Ms. B.C. XLIX







